

Inatsisartut aamma Inatsisartut allaffeqarfiani aningaasartuutit tamanit takuneqarsinnaanngornissaat kiisalu kiilluunniit paasiniaasinnaanngornissaa anguniarlugu Inatsisartut Suleriaasiata allanngortinnissaanut Inatsisartut Siulittaasoqarfia saqqummiusseqqullugu peqquneqarnissaanik Inatsisartut aalajangiiffigisassaattut siunnersuut.

(Inatsisartunut ilaasortaq Randi Vestergaard Evaldsen, Demokraatit)

pillugu

Suleriaatsimut Ataatsimiititaliap

ISUMALIUTISSIISSUTAA

siunnersuutip aappassaaneerpeqarnissaanut saqqummiunneqartoq

Ataatsimiititaliap suliarinninnermini ilaasortarai:

Inatsisartunut ilaasortaq Lars-Emil Johansen, Siumut, siulittaasoq

Inatsisartunut ilasortaq Agathe Fontain, Inuit Ataqtigii

Inatsisartunut ilaasortaq Juliane Henningsen, Inuit Ataqtigii

Inatsisartunut ilaasortaq Justus Hansen, Demokraatit

Inatsisartunut ilaasortaq Nikolaj Jeremiassen, Siumut

Inatsisartunut ilaasortaq Steen Lyng, Atassut

Inatsisartunut ilaasortaq Anthon Frederiksen, Partii Naleraq

Aallaqqaasiut

Siunnersuutit ulloq 28. april 2015 Inatsisartuni siullermeerneqarnermini Suleriaatsimut Ataatsimiititaliamut suliarineqartussanngortinneqarpoq. Isumaliutissiissutikkut matumuuna Inatsisartut aalajangiinissaminut tunngavissaattut tapiliussatut itisiliissutitullu ataatsimiititaliap isumaliutai saqqummiunneqarput.

Siunnersuutip imarisai siunertaalu pingaarnerusut

Siunnersuutigineqarpoq Inatsisartut Suleriaasiata allanngortinneqarnissaanik siunnersuuteqaqqullugu Siulittaasoqarfik peqquneqassasoq, Inatsisartut aamma Inatsisartut Allattoqarfia aningaasartuutaasa tamanit takuneqarsinnaanngornissaat kiisalu kikkunnulluunniit paasiniaavigineqarsinnaalernissaat anguniarlugu.

Siunnersuutip Inatsisartuni siullermeerneqarnera

Siullermeerinninnermi partiit oqaaseqartuinit siunnersuut nalinginnaasumik assigiinngitsumik taparserneqarpoq.

Taamaalillutik partiit tamarmik, Inuit Ataqatigiit eqqaassanngikkaanni, siunnersuut tunngaviatigut taperserpaat, taamatullu aamma oqaaseqartut allallit oqaatigalugu timitaliineq aningaasartuutaavallaartariaqanngitsoq. Taamatuttaaq pisariaqartinneqarpoq paasissutissat inunnut suliffeqarfinnulluunniit ataasiakkaanut tunngalluinnartut paasitinneqarsinnaatitaanermut ilaatinneqannginnissaat. Tamatuma saniatigut oqaaseqartut arlallit pissutissaqarlutik uparuarpaat Inatsisartut ukiumoortumik nalunaarutaatigut maannangaq Inatsisartut aningaasaqarniarnerat pillugu paasissutissat sukumiilluinnartut innuttaasunut paasissutissiissutigineqartareermata, taamalu siunnersuutip timitalerneqarnissaata pisariaqarnera killilittut oqaatigineqarluni.

Inuit Ataqatigiit siunnersuuteqartup tunngavilersuutaanik sukumiinerusunik tusarusupput siunnersuutip erseqqinnerusunik isummerfigineqannginnerani.

Inatsisartut Siulittaasoqarfiat itisiliissutaasunik akissuteqaasorsimavoq.

Ataatsimiititaliap siunnersuummik suliarinninnera

Paasitinneqarsinnaatitaaneq pillugu inatsimmi aalajangersakkat

Siunnersuutip siullermeerneqarnerani paasitinneqarsinnaatitaaneq pillugu paasitinneqarsinnaatitaaneq pillugu inatsimmi aalajangersakkat siunnersuummut matumunnga najoqqutassatut innersuussutigineqartarput.¹ Ilisimaneqartutut paasitinneqarsinnaatitaaneq pillugu inatsimmut Inatsisartut taakkulu ataanni suliffeqarfiit ilaatinneqanngillat, taamatullu aamma paasitinneqarsinnaatitaaneq pillugu inatsit Inatsisartut Inatsisartullu ataanni suliffeqarfiit eqqarsaatigalugit assut atuutsikkuminaassalluni, naalakkersuinikkut pissusiviusut pissusissamisoorumik tatigeqatigiinnissamik pisariaqartitsinerata pisariaqartitsinerata malitsigisaanik inatsimmi immikkut assigiinngitsunik aalajangersaasoqanngippat. Tamatumunnga atatillugu immikkut pingaaruteqarpoq aamma oqaatigissallugu paasitinneqarsinnaatitaaneq pillugu inatsit ilusilersorneqarsimammat oqartussat innuttaasunut ataasiakkaanut sammisunik aalajangiisartut eqqarsaatigalugit, taamaattumillu innuttaasut aalajangersimasunik pisinnaatitaaffeqarnerat inatsimmi aamma qularnaartariaqarluni. Inatsisartullu suliassat tassaavoq inatsisiliornernik akuersissuteqartarnissaq, suliassani inunnut ataasiakkaanut tunngasuni aalajangiisartussaanatik.

Paasitinneqarsinnaatitaaneq pillugu inatsit sakkussatut taamaalilluni ilusilerneqarsimannngilaq Inatsisartunut suliffeqarfinnullu tassunga atasunut piukkunnarluni. Danmarkimi siusinnerusukkat paasitinneqarsinnaatitaaneq pillugu inatsimmut, annertuutigut Inatsisartut inatsisaannut atuuttumut naapertuuttumut, taamaalilluni aamma Folketingi taakkulu ataanni suliffeqarfiit ilaatinneqarsimannngillat.

¹ Pisortat ingerlatsinerat pillugu paasitinneqarsinnaatitaaneq pillugu Inatsisartut inatsisaat nr. 9, 13. juni 1994-imeersoq. Inatsit kingullermik 2001-imi allanngortinneqarpoq.

Taamaattumik pissutsinik Inatsisartunut, Inatsisartut ataatsimiititaliaannut kiisalu Siulittaasoqarfimmut tunngasunik taakkulu aningaasartuutigisartagaannik sukumiinerusumik paasitinneqarnissamik qinnuteqaatit ullumikkut taamaallaat Siulittaasoqarfiup sukumiinerusumik naliliineri tunngavigalugit inatsisitigullu aalajangersagaanngitsumik pisinnaapput, tamannalu aatsaat tatigeqatigiinnissaq Inatsisartuni naalakkersuineramik suliaqarnerup pissusissamisoorumik ilagilluinnagaa isiginiarlugu pisinnaagaangat.

Nukissanik atuineq eqqarsaatigalugu siunnersuut ulluinnarni qanoq timitalerneqarsinnaava?

Siullermeerinninnermi oqaaseqartut arlallit ernummatigaat siunnersuutip timitalerneqarnera allattoqarfiup aningaasartuuteqarnerulerneranik kinguneqassanersoq.

Siunnersuuteqartup oqaatigaa siunnersuut naammassineqarsinnaagaluartoq ass. Inatsisartut aningaasartuutitut uppersaataasa tamarmik Inatsisartut nittartagaanni saqqummiunneqartalerneqartut, imaluunniit pissutsit pineqartut pillugit paasitinneqarsinnaatitaanerup inatsisitigut tunngavissalerneqarneratigut, taamatut qinnuteqaatit ingerlaavartumik Siulittaasoqarfimmit aamma/imaluunniit Inatsisartut allattoqarfiannit suliarineqartussanngorlugit.

Ullumikkut ukiumut aningaasartuutitut isertitanullu uppersaatait 2.000-it missaasa Inatsisartut Aningaasaqarnermut immikkoortorta ataqarsartarpaat. Tamakkununga uppersaatait tamarmik assilillugit Inatsisartut nittartagaannut ilanngunneqartallissagaluarpata aningaasaqarnermut immikkoortortami sulisunik aningaasanillu amerlanerusunik atuinnissaq pisariaqartinneqassaaq. Tamatuma saniatigut uppersaatait nittartakkakkut saqqummiunneqartariaqassapput immaqalu kalaallisut danskisullu nassuiaammik ilaqartinneqarlutik, tassami aningaasartuutitut uppersaatait amerlanerpaartaat ullumikkut oqaatsit taamaallaat ataatsit, amerlanertigut danskit oqaasii atorlugit saqqummiunneqartarmata, tamannalu Inatsisartut nittartagalerisuata annikigisassaannngitsumik suliaqarnerulerneranik kinguneqassaaq. Tamatuma saniatigut atorussat kingunerisaannik apequtit assigiinngitsorpasuit akissuteqarfigineqarnissaannut allaffeqarfimmi sulisut allat qanoq annertutiginissaa ilisimaneqanngitsumik sulinerunissaat pisariaqassasoq naatsorsuutigineqartariaqarpoq. Naggasiullugu minnerunngitsumilli oqaatigineqartariaqarpoq aningaasartuutitut uppersaatait ataasiakkaat inunnut ataasiakkaanut paasissutissanik tamanit ilisimaneqartariaqanngitsunik imaqarsinnaammata. Assersuutigalugu taamaattoqarsinnaavoq ilaasortat aamma/imaluunniit sulisut peqqissusiannut atatillugu imaluunniit ilaqutaasut qaninnerit akornanni peruluttoqarneranut aamma/imaluunniit toqukku qimaguttoqarneranut atatillugu aningaasartuuteqartoqarsimatillugu. Taamaattumik uppersaatait scannerlugu assilinnnginnerani tamanullu saqqummiunneqannginnerani aningaasartuuteqarsimaneranut uppersaatait ataasiakkaat isertuunneqartariaqartunik imaqarnerisut naliliivigineqarnissaat pisariaqassaaq. Taamaattumik sulisut aningaasallu maanna pigineqartut atorlugit suliaqarsap tamatuma ingerlanneqarsinnaanissaa ataatsimut isigalugu piviusorsuunngilaq.

Taamatut ingerlaavartumik saqqummiussisarneq ataatsimut isigalugu taamaasilluni aqputigineqarsinnaanngitsutut isikkoqarpoq.

Siunnersuut aningaasartuuteqarsimanermit uppernarsaatiniq attuumassuteqartunik takunissinnaatitaanermit inatsimmik tunngavilikkamik pisinnaatitaaffimmik ilanngussinikkut naammassineqassappat, tamanna allaffissornikkut nukissanik annertunerusunik piunasaqaatitaqassanersoq nalileruminaappoq. Oqaatigineqareersutut ullumikkut taamatut qinnuteqaataasartut amerlanersaat ingerlaavartumik suliassat ilaattut naammassineqartareerput, tamatumunngalu atatillugu aamma soorunami nalilersorneqartarluni uppernarsaatitun ilanngussat inunnet suliffeqarfinnullu ataasiakkaanut paasissutissanik mianerisariaqartunik imaqaarnersut, kisiannili mattunneqarsinnaanngilaq taamatut paasitinneqarsinnaatitaanermit inatsisitigut aalajangersakkamik ilanngussisoqarnera immi pissutissaqalersitsisinnaammat qinnuteqaataasartut amerlanerulernerannik taamalu nukissanik atuinerulernermit malitseqarluni. Tamatumunnga peqatigitillugu isumaliutigineqartariaqarpoq erseqqinnerusumik kikkut taamatut aningaasanut tunngasunik paasissutissanik kissaatigineqartunik tunniussisartuussanersut. Pissusissamisoornerpaassagunarpoq suliassaq tamanna allattoqarfimmut tunniunneqarpat, tassami qinnuteqaatinik taamaattumik, siunnersuut naapertorlugu itigartinneqarsinnaasusaanngitsunik, ingerlaavartumik suliarinninneq Siulittaasoqarfimmik artukkiisariaqanngimmat. Taamaalluni Siulittaasoqarfiup taamaallaat isummerfigisassavai suliassat tunngaviusumik isummerfiusariaqartut.

Suleriaatsimi nutaamik aalajangersagaliortoqarnerani suut isiginiarneqassappat?

Siunnersuut akuersissutigineqassagaluarpat aalajangersakkamik nutaamik aningaasartuutaasimasut pillugit paasitinneqarsinnaatitaanermit imalimmik Inatsisartut Suleriaasianni ass. § 55a-tut nutaatut ilanngussisoqarsinnaagaluarpoq. Taamatut aalajangersakkap ilusilersorneqarnerani pissusissamisuussaaq inatsisissamik piareersaasiornermit atatillugu ilaatigut ataani taaneqartut isumaliutigineqarpata, oqaatigineqassalluni ataani taaneqartut tamakkiisutut isigineqarsinnaanngimmata:

I Aalajangersakkap atuuffia.

Siunnersuuteqartup oqaatigaa taamaallaat kissaatigineqartoq Inatsisartut allattoqarfiata aningaasartuutaat pillugit paasitinneqarsinnaatitaanerup inatsisitigut tunngavissinneqassasoq, tamatumani Inatsisartut Allattoqarfiat pineqarluni, kisiannili Inatsisartut Ombudsmandiat pineqarani. Taamatuttaaq tamatuma avataaniissapput pisortani oqartussat allaluunniit Inatsisartut Allattoqarfiata suleqatigisimasinnaasai.

Isumaliutigineqartariaqassaaq taamatut inatsisitigut tunngavissinikkut kissaatigineqarnerasoq aningaasartuutitut uppernarsaatit ilaatinneqassanersut, imaluunniit qinnuteqaateqartup sukumiinerusumik kissaatai tunngavigalugit erseqqinnerusumik aningaasartuutaasimasut immikkoortiterlugit takussutissiarineri naammassanersut. Kingullertut taaneqartoq nukissanik atuneq eqqarsaatigalugu orniginarnerpaatut isikkoqarpoq, kisiannili tamatigut naammassagunarani siunnersuuteqarnikkut siunertarineqartut tamakkiisumik

naammassinissaanut; tassalu aningaasartuutiniq suugaluartunilluunniit innuttaasut paasitineqarsinnaanissamat periarfissaqalernissaat, taamaaliornikkullu tatigeqatigiinnermik pilersitsisoqarluni, taamalu aamma aningaasaatinik akisussaassuseqartumik atuineq siuarsarneqarluni.

Aallaavittut ulluinnarni sulinermi atugassarititaasut pissutigalugit taamaallaat pineqartariaqarput piffissap aalajangersimasup iluani aningaasartuutaasimasut, taamaalilluni suliassamik suliarinninnissamat uppersaatitut atortussat annerusumik ajornartorsiutitaqanngitsumik pissarsiarineqartarsinnaassammata. Taamatut ukiunut kingullernut marlunnet sinnernagillu killiliinissaq pissusissamisoortutut isikkoqarpoq.

Inatsisartut allattoqarfiatalu pisortani oqartussanut, soorlu akileraartarnikkut oqartussanut, Naatsorsueqqissaartarfimmut, politiinut eqqartuussiveqarfinnullu atugassatut paasissutissiissutaat aalajangersakkamat ilaatinneqassanngillat.

II. Paasitineqarsinnaatitaanermut ilaanngitsut.

Aningaasartuutit inunnet ataasiakkaanut tunngalluinnartutut isigineqartariaqartut pillugit paasissutissat, taamatullu aamma aningaasartuutit inuit ataasiakkaat namminneq aningaasatigut atugaannut tunngasutut, soorlu aningaasarsiaqarnerannut tunngasutut, oqaatigineqarsinnaasut ilaatinneqartariaqanngillat.

Aningaasartuutaareersut pillugit paasitineqarsinnaatitaaneq killilerneqarsinnaasariaqarpoq tamanna inuiaqatigiit eqqarsaatigalugit isiginiagassat pingaarutillit allat eqqarsaatigalugit tamanna pisariaqartutut nalilerneqarpat. Tamatumunnga atatillugu paasitineqarsinnaatitaaneq pillugu inatsimmi § 13 najoqqutassatut isigineqarsinnaavoq.

Kiisalu aamma isumaliutigineqartariaqarpoq nalinginnaasumik aalajangersakkamik ilanngussisoqarsinnaanera, taanna malillugit Suleriaatsimut Ataatsimiititaliaq, pisut apeqqutaatillugit aatsaallu tamanna pissutissaqarluartillugu, piginnaatinneqassalluni aalajangissallugu aningaasartuuteqarsimanerit aalajangersimasut paasitineqarsinnaatitaanermut ilaatinneqannginnissaannik. Inatsisissamik piareersaataasunik suliaqarnermi isumaliutigineqartariaqarpoq taamatut aalajangersaasoqarpat tamanna aaqquissuussinermut tatiginninnermut ajoqutaasinnaannginnersoq.

III. Paasitineqarnissamik qinnuteqaatit suliarineqarneri aalajangiivigineqarnerilu.

Pisariaqarpat ilanngunneqarsinnaagaluarpoq Suleriaatsimut Ataatsimiititaliaq aningaasartuutaasimasut pillugit paasitineqarsinnaatitaanermut sukumiinerusunik malittarisassiorsinnaasoq.

Aningaasartuutaasimasunik paasitineqarnissamik qinnuteqaatit nalinginnaasumik Inatsisartut allattoqarfiannit suliarineqartassapput, suliassat tunngaviusumik pingaarutillit Siulittaasoqarfimmut saqqummiunneqartarlutik.

Aningaasartuutaasimasunik paasitinneqarnissamik qinnuteqaatit akissuteqarfigineqarnissaannut aalajangersimasumik piffissaliisoqartariaqanngilaq. Tamanna tunngaviusumik kissaatiginarsinnaagaluarpoq, misilittakkalli takutippaat sukumiisumik paasissutissinneqarnissamik qinnuteqaatit suliarinerat sivisusinnaasartuq, taamaattumillu taamaallaat pissusissamisoortutut isigineqarluni, aalajangiinerit, nalinginnaasumik pitsaasumik suliaasnik suliarinninnermi ileqqussat naapertorlugit, sapinngisamik sukkanerpaamik pippata, Inatsisartut allattoqarfiullu suliaasnik allanik isumaginninnerat isiginiarlugu.

Ataatsimiititaliap inaarutaasumik oqaaseqaatai

Siulittaasoqarfik ataatsimiinnermut matumunnga Inatsisartut Suleriaasiata allanngortinneqarnissaanut siunnersuuteqarpoq. Pissusissamisoorluinnarsimassagaluarpoq siunnersuut manna inatsisissatut siunnersuutit ataatsimoortut Inatsisartunut saqqummiunneqannginneranni piareersaataasumik sulinermut ilaatinneqarsimasuuppat.

Taamaattorli suleriaatsip allanngortinneqarnissaanut siunnersuuteqarnikkut siunnersuut manna timitalerneqassappat tamanna suliaassaasaaq imaaliiallaannaq naammassineqarsinnaanngitsoq, taamatullu aamma Inatsisartut namminerisaminnik inatsisiliornermi pipallatanik inatsisiliornissaq pinngitsoorniartariaqarlugu.

Ataatsimiititaliami amerlanerussuteqarput isumaqarput aningaasaqarnermut tunngasut pillugit paasitinneqarsinnaatitaanermik tunngavissiisumik inatsisitigut aalajangersaasoqarpat, inatsisiliornissaq imaannaanaviannitsoq, paasissutissat inunnut ataasiakkaanut suliffeqarfinnullu tunngalluinnartut immikkut isiginiarneqassappata.

Taamatuttaaq ilimanarpoq taamatut inatsisiliorneq annertuumik allaffissornermik malitseqarsinnaassasoq, tamannalu pissusissamisoortutut isigineqarani.

Ataatsimiititaliami amerlanerussuteqartut ilisimaaraat Siulittaasoqarfik inatsisitigut aalajangersagaanngitsumik tunngavilimmik pisumiillu pisumut erseqqinnerusumik nalilersuereernikkut aningaasaqarnermut tunngasunik paasitinneqarnissamik qinnuteqartoqartillugu akuersisartuq. Ataatsimiititaliap aamma nalunngilaa Siulittaasoqarfiup periarfissaq tamanna akuttunngitsumik atortareeraa. Tamanna tunngavigalugu ataatsimiititaliaq isumaqarpoq annerusumik inatsisiliornissamik aallartitsinissamut taamaallaat killilerujussuarmik pisariaqartitsisoqartoq.

Ataatsimiititaliami amerlanerussuteqartut ataatsimut isigalugu siunnersuuteqarnikkut anguniarneqartoq ajoriffissaqartinnikkaluarpaat, taamaattorli pissutsit qulaaneq taaneqartut tunngavigalugit siunnersuutip itigartinneqarnissaa inassutigisariaqarlugu.

Demokraatit ikinnerussuteqarlutik oqaaseqaataat

Demokratit tupigusuutigalugulu pakatsissutigaat, Inatsisartuni amerlanerussuteqartut innuttaasut tusagassiortullu periarfissikkumaneqanngimmata Inatsisartuni aningaasatigut

aalajangiisarnerit malinnaavigissallugit. Tamat oqartussaaqataaneranut pakatsinarpoq, qinikkat allaffimmilu pisortat innuttat akileraarutaat qanorluunniit aqussinnaammasuk, innuttat ataasiakkaat pisinnaatitaaffigimmasuk sunaluunniit paasiniarsinnaallugu, minnerunngitsumik aningaasatigut atuinermi. Demokraatit nalunngilluinnarpaat, kisitsisit qulequtaanerusut Inatsisartut ukiumoortumik nalunaarutaanni takuneqarsinnaammata, kisitsisillu ajoraluartumik takussutissartaqanngillat itinerusumik, aningaasallu sukumiisumik qanoq atorineqavissimanersut takuneqarsinnaanani.

Demokraatit tamatumani eqqaassutigissavaat, Naalakkersuisuni siulittaasuusimasup Aleqa Hammondip tamannarpiaq pissutigalugu soraartariaqarsimammat, uppersaatilimmik takussutissaqarmat aningaasatigut atonerluisimasoq, akileraartartullu akilersugaannik nammineq imminut atugassaminnik atuisimasoq soorlulusooq minibarimi atukkani assersutigineqarsinnaasut. Paasissutissat taamaattut taamaallaat tamanut saqqummersinneqarsinnapput nakkutilliinissamik periarfissaqarpat, nakkutilliinissamullu periarfissatuarpur amerlanerussuteqartunit taamaatiinnarneqarluni unitsinneqarpoq, uuma siunnersuutip itigartinneqarpoq.

Isumaliutissiissut matumani pineqartoq assigiinngitsunik tunngavilersuilluni siunnersuummik isorinnippoq. Patsisaasut utoqqatsissutissapalaatut oqaatigineqarsinnaapput. Suleriaaseq pillugu ataatsimiititaliap isumaa aamma taamaappoq, inatsisiliornermi aningaasartuutaasut annertuvallaarnerarlugit. Tamat oqartussaaqataanerannik periarfissaliisoqarpat nakkutilliisoqarsinnaasooq itigartinneqanngisaannartariaqaraluarpoq, ataatsimiititaliami imatut isummerfigineqarmat, aningaasatigut akisuvallaassasoq piviusunnungussappat. Naalakkersuinikkut suliaqarniarluni ilumut tamat oqartussaaqataanerannik taamatorsuaq innarliisoqarsinnaava?

Aammattaaq utoqqatsissutissapalaatut oqaatigisariaqarpoq, inummut tunngasut aammalu suliffeqarfimmut tunngasutigut akornusiisinnaaneq pisariuvallaartoq. Suleriaaseq pillugu ataatsimiititaliaq ilumut taamatut isumaqarsimappat, taava Naalakkersuisuni periusissaminnik ujartuisinnaapput. Naalakkersuisuni akuttungitsumik inummut tunngasuusinnaasunik suliaqartoqartarpoq, tamanilu paasissutissanik inummut mianernarsinnaasunik suliaqallaqqippat. Sooq tamanna Inatsisartuni allaanerussava? Soorunami aamma Inatsisartuni ajornaquteqanngilaq.

Demokraatit ataatsimut isigalugu isumaqarput, Suleriaaseq pillugu ataatsimiititaliami amerlanerussuteqartut kissaatiginngikkaat tusagassiortut innuttaasullu ilisimasaqarfigilissagaat, akileraartartut aningaasaataat qinikkanit atorfeqartitanillu qanoq atorineqarnersut. Tamanna ilumut pakatsinarluinnarpaq.

Demokratiniik oqaaserineqartut tunngavigalugit siunnersuutip akuersissutigineqarnissaa innersuussutigaarput.

Ataatsimiititaliap inassuteqaatai

Ataatsimiititaliami amerlanerussuteqartut Siumup, Inuit Ataqatigiit, Partii Naleqqap Atassutillu sinniisaasa siunnersuutip **itigartinneqarnissaa inassutigaat.**

Ataatsimiititaliami ikinnerussuteqartut Demokraatit sinniisaata siunnersuutip **akuersissutigineqarnissaa inassutigaat.**

Taamatut oqaaseqarluni isumaliutissiissummilu taaneqartutut paasinnilluni, isumaliutissiissummilu aallaaviit nalorngissutillu tunngavigalugit, ataatsimiititaliap matumuuna siunnersuut aappasaaniigassanngortippaa.

(Siulittaasoq)

